



Wan gaed blong ol apliken blong Pacific Engagement Visa (PEV):

Hao blong mekem yu rere blong wok long Ostrelia

Gaed ia hem i talemaot ol infomesen we i impoten blong olgeta we oli gat wan PEV blong mas save bifo long taem we oli statem wan niufala wok long Ostrelia. Hem i eksplenem ol ligol raet blong yu olsem wan woka mo hem i talemaot wanem nao yu save ekspektem se bae i hapen long wan wokples long Ostrelia - blong helpem yu blong rere mo gat konfidens.

Ol raet blong yu olsem wan woka long Ostrelia

Olgeta we oli gat visa mo ol maegren woka oli gat ol semak raet mo proteksen long saed blong wok olsem ol narafala woka long Ostrelia, nomata long sitisensip o wanem kaen visa.

Ol raet blong yu olsem wan pemanen residen

- Yu gat raet blong wok long eni emploia, long eni wok, mo long eni ples long Ostrelia.
- Ol raet blong yu long wok oli kam anda long loa blong Ostrelia tru long Fair Work Act.
- Ol wok we oli pemanen, mo ol fixed-term wok we i inkludum ol ful taem o pat taem wok (hemia we oli mitim rul blong PEV) oli stap givim ol entaetolmen long woka olsem ol liv we oli pem: sik liv, kera liv mo anuol liv.

Hao blong eksplenem visa blong yu long ol emploia

PEV hem i wan niufala program i minim se samfala emploia maet oli no save long hem yet. Maet yu nid blong talem long olgeta se taem yu karem visa ia bae yu gat ol raet blong wok blong wan pemanen residen.

Emloimen Sapot Sevis blong PEV i save toktok long ol emploia long bihaf blong yu blong eksplenem program ia.

Wanem blong mekem sapos i gat wan problem long wok

Fair Work Ombudsman (FWO) blong Ostrelia hem i wan ejensi blong gavman we hem i givimaot ol fri advaes, edukesen mo sapot long ol woka blong oli andastanem ol raet blong olgeta long wokples.

Sapos yu ting se wan emploia hem i no stap rispektem ol raet blong yu o hem i stap brekem loa long saed blong ol kondisen blong wok, yu save kolek FWO long fon blong kasem fri advaes mo sapot.

Sapos yu gat eni kwesten abaotem pei mo ol entaetolmen blong yu, yu save:

- Kolek FWO long 13 13 94 (yu save kolek Translating and Interpreting Service (TIS) long 13 14 50 fastaem blong kasem wan fri intepreta blong toktok long lanwis blong yu)
- Rejista long My account blong askem wan kwesten tru long wan onlaen fom blong olgeta
- Kalkuletem pei blong yu mo ol liv entaetolmen tru long Pay and Conditions Tool: calculate.fairwork.gov.au

Bae yu no save kasem trabol long wok o lusum visa blong yu sapos yu kontaktem FWO.

Yu save kasem moa infomesen long websaet blong FWO: fairwork.gov.au/migrantworkers

Mo tu yu save wajem ol video blong FWO long lanwis blong yu blong helpem yu blong andastanem ol stamba raet blong wokples mo ol entaetolmen: fairwork.gov.au/language-help/language-storyboards

Sapos yu wantem moa infomesen long saed blong statem wan niufala wok, yu save mekem wan onlaen kos blong FWO long: fairwork.gov.au/tools-and-resources/online-learning-centre/starting-a-new-job



Andastanem wokples kalja long Ostrelia

Ol wokples long Ostrelia oli difren lepet long ol wokples long Pasifik mo Timor-Leste.

Sapos yu andastanem ol difrens ia bae i helpem yu blong stap gud long niufala wok blong yu mo bildimap ol gudfala rilesensip wetem ol narafala woka mo supavaesa.



Toktok stret

- Ol man Ostrelia oli stap toktok stret long ol wokples bitim olgeta we i kamaot long ol kalja blong Pasifik
- Long Ostrelia, hem i nomol blong askem kwesten, blong jekem gud ol instraksen blong mekem sua se i klia, mo blong talemaot eni konsen blong yu i go long ol supavaesa blong yu
- Tokaot blong talemaot tingting blong yu i soemaot se yu stap tekem lidasip long wok blong yu mo hem i no luk olsem yu stap nogat rispek long ol man blong otoriti
- Long ol wokples, i gat plante toktok we i no fomol tumas, mo hem i save hapen tu wetem ol maneja.



Askem help

- Ol emploia long Ostrelia oli stap ekspektem se sapos yu no kasem save long wan samting yu mas askem kwesten
- Sapos yu talem se yu no save o yu nidim help hem i oraet nomo mo hem i soemaot se yu hones
- Sapos yu konfus be no askem eni kwesten bae emploia i save luk hem olsem wan problem.



Wok wetem ol maneja

- Ol maneja plante taem i isi blong toktok long olgeta mo oli ekspektem se bae i gat toktok oltaem
- Ol supavaesa oli stap blong sapotem yu mo givim daereksen long wok

- Ol miting wetem maneja blong yu ('one-on-one') oli wan nomol pat blong wok
- Hem i nomol mo hem i oraet nomo blong storian wetem ol maneja long taem blong spel.



Kam long taem

- Ol emploia long Ostrelia oli ekspektem se bae yu kam long wok long taem o bifo long taem blong wok
- Hem i nomol blong yu save kolem supavaesa blong yu sapos yu stap let long wok. Be blong kam let long wok oli no akseptem tumas long Ostrelia sapos hem i no from wan samting we yu no save kontrolem olsem ol dilei blong pablik transpot.



Yu save kasem moa infomesen long saed blong Emploimen Sapot Sevis blong PEV long websaet ia: pev.gov.au

Long websaet blong mifala, yu save faenem moa risos, olsem ol pepa blong infomesen long saed blong emploimen mo ol templet blong mekem wan resume (CV). Mo tu yu save saenap long ol Emploimen Infomesen Sesen blong lanem moa long saed blong hao blong lukaotem wok long Ostrelia.

